

XVIII თავი

სტუდენტების უფლებებისა და კანონიერი ინტერესების დაცვა, კარიერული განვითარება და სხვა სტუდენტური სერვისები (განახლებული რედაქცია - თებერვალი, 2022 წ)

ბსუ-ს სტუდენტების უფლებებისა და კანონიერი ინტერესების დაცვას, სტუდენტური პროექტების განხორციელებას, მათი კარიერული განვითარების ხელშეწყობასა და მომსახურებას უზრუნველყოფს სტუდენტთა კარიერული განვითარების, კულტურისა და სპორტის დეპარტამენტი, რომლის ფუნქციებია:

- ა) უნივერსიტეტის სტუდენტთა უფლებებისა და კანონიერი ინტერესების დაცვა.
- ბ) საუნივერსიტეტო აქტივობების განხორციელებისათვის სტუდენტთა მხარდაჭერა, სხვადასხვა სოციალური პროექტების მომზადება და განხორციელებისათვის ხელშეწყობა;
- გ) უნივერსიტეტის სასწავლო, სამეცნიერო, კულტურული, სპორტული საქმიანობის პოპულარიზაცია, ორგანიზება და განხორციელებისათვის ხელშეწყობა (საუნივერსიტეტო ინტელექტუალური/სამეცნიერო/შემეცნებითი ხასიათის და საქველმოქმედო სახის შემოქმედებითი სტუდენტური ღონისძიებების დაგეგმვა და განხორციელება;
- დ) საუნივერსიტეტო სპორტული გუნდების, მუსიკალური ანსამბლებისა და შემოქმედებითი ჯგუფების შექმნის შესახებ სტუდენტთა ინიციატივების წარმოდგენა, მათი რეალიზაციისათვის ხელშეწყობა და საქმიანობის კოორდინაცია;
- ე) საუნივერსიტეტო სპორტის განვითარება, სპორტის პოპულარიზაცია, სპორტული ღონისძიებების/უნივერსიადების ორგანიზება, ნიჭიერი სტუდენტების გამოვლენა, უნივერსიტეტის სახელით რეგიონალურ და რესპუბლიკურ უნივერსიადებში და სტუდენტურ დღეებში მათი მონაწილეობის ხელშეწყობა;
- ვ) უნივერსიტეტის სტუდენტების ჰარმონიული განვითარებისა და სახელოვნებო სივრცეში მათი მოზიდვის ხელშეწყობის მიზნით შესაბამისი შემოქმედებითი კონტაქტების დამყარება და უნივერსიტეტის სტუდენტების შემოქმედებით საქმიანობაში ჩაბმაზე ზრუნვა, მათი ნიჭისა და სურვილის შესაბამისად;
- ზ) საგანმანათლებლო სფეროში მიმდინარე სხვადასხვა კონკურსების, პროექტების და პროგრამების შესახებ ინფორმაციის მოპოვება და უნივერსიტეტის სტუდენტებისათვის გაცნობა;
- თ) სტუდენტების ხელშეწყობა დასაქმებისათვის აუცილებელი ზოგადი უნარჩვევების განვითარებაში, მათი ინფორმირება შრომის ბაზრის დინამიკასა და პერსპექტივებზე, სტუდენტთა დასაქმების ხელშეწყობის სხვადასხვა ღონისძიებების დაგეგმვა და განხორციელება, დამსაქმებლებთან მჭიდრო თანამშრომლობა მათი სასწავლო პროცესთან დაახლოებისა და სამომავლოდ, საგანმანათლებლო პროგრამების განხორციელებაში ჩართულობის უზრუნველსაყოფად;
- ი) სტუდენტების დახმარება მათი კარიერის დაგეგმვასა და განვითარებაში;
- კ) სტუდენტთა დასაქმების ხელშეწყობის მიზნით ინფორმაციის გაცვლა, შრომის ბაზრისა და დასაქმების საკითხებზე სახელმწიფო, არასამთავრობო თუ საერთაშორისო ორგანიზაციებთან თანამშრომლობა;

ლ) შეზღუდული შესაძლებლობის მქონე სტუდენტების მხარდაჭერა, საუნივერსიტეტო ცხოვრებაში მათი ინტეგრირების მიზნით და შესაბამისი წინადადებების უნივერსიტეტის ადმინისტრაციისათვის წარდგენა;

მ) საქართველოს კანონმდებლობით და უნივერსიტეტის აქტებით განსაზღვრული სხვა ფუნქციები.

სტუდენტური ინიციატივები და პროექტები

სტუდენტური ინიციატივებისა და პროექტების წარმოდგენისა და საუნივერსიტეტო გადაწყვეტილების მიღება რეგულირდება ბსუ-ს **სტუდენტური პროექტების დაფინანსების წესით** (წინამდებარე გზამკვლევის **დანართი 17**)

სტუდენტური პროექტი შეიძლება იყოს:

ა) **სამეცნიერო პროექტი** - პროფესიული უნარ-ჩვევების განვითარებასთან დაკავშირებული კვლევითი სახის პროექტი;

ბ) **საგანმანათლებლო პროექტი** - არაფორმალურ განათლებასთან დაკავშირებული შემეცნებითი სახის პროექტი;

გ) **კულტურულ-შემოქმედებითი პროექტი** - სახელოვნებო და შემოქმედებითი სახის პროექტი;

დ) **სპორტული პროექტი** - ოლიმპიური თამაშობებიდან ნებისმიერი სახეობის პროექტი - სტუდენტებში მასობრივი სპორტის წახალისებისა და ჯანსაღი ცხოვრების წესის დამკვიდრების მიზნით.

სტუდენტური პროექტი უნდა იყოს ბსუ-ს მისიის, სტრატეგიული გეგმისა და სამოქმედო გეგმის შესაბამისი სამეცნიერო, საგანმანათლებლო, კულტურულ-შემოქმედებითი და სპორტული საქმიანობის ხელშემწყობი.

ბსუ-ს ანსამბლების (ცეკვის, სიმღერის), შემოქმედებითი ჯგუფების და სპორტული გუნდების შექმნა

ბსუ-ს წარმომადგენლობითი საბჭოს 2016 წლის 13 ივლისის N05 გადაწყვეტილებით დამტკიცებული „ბსუ-ს ანსამბლების (ცეკვის, სიმღერის), შემოქმედებითი ჯგუფების და სპორტული გუნდების შექმნისა და მათი საქმიანობის წესის“ (წინამდებარე გზამკვლევის **დანართი 18**) **თანახმად**, ბსუ-ს ანსამბლები (ცეკვის, სიმღერის), შემოქმედებითი ჯგუფები და სპორტულ გუნდები იქმნება (შემადგენლობა მტკიცდება) ბსუ-ს ადმინისტრაციის ხელმძღვანელის ბრძანებით, ბსუ-ს დამხმარე სტრუქტურული ერთეულის - სტუდენტთა კარიერული განვითარების, კულტურისა და სპორტის დეპარტამენტის სამსახურებრივი ბარათის საფუძველზე.

სპორტული გუნდების, მუსიკალური ანსამბლებისა და შემოქმედებითი ჯგუფების საქმიანობის დაფინანსება ხორციელდება უნივერსიტეტის ბიუჯეტიდან, მოქმედი კანონმდებლობის შესაბამისად გამოცემული ბსუ-ს ადმინისტრაციის ხელმძღვანელის ბრძანების საფუძველზე.

ბსუ-ს სტუდენტების სხვადასხვა ღონისძიებაში (საგანმანათლებლო, სამეცნიერო, შემოქმედებითი, სპორტული ან კულტურული) მონაწილეობის დაფინანსება

ბსუ-ს სტუდენტების სხვადასხვა ღონისძიებაში (საგანმანათლებლო, სამეცნიერო, შემოქმედებითი, სპორტული ან კულტურული) მონაწილეობის წახალისების მიზნით ბსუ-ს წარმომადგენლობითი საბჭოს გადაწყვეტილებით (წინამდებარე გზამკვლევის **დანართი N23**) დაწესებულია თითოეული სტუდენტისათვის ერთჯერადი წამახალისებელი ფულადი ჯილდო:

- ა) ერთი დღისათვის არაუმეტეს 30 ლარისა - ქალაქგარეთ (ბათუმიდან 30 კმ-ზე მეტ მანძილზე) გასამართი ღონისძიებისათვის;
- ბ) ერთი დღისათვის არაუმეტეს 100 ლარისა - უცხო ქვეყანაში გასამართი ღონისძიებისათვის.

სტაჟირება ბსუ-ში

ბსუ-ში სტაჟირების გავლა შესაძლებელია „ბსუ-ში სტაჟირების გავლის წესის“ (წინამდებარე გზამკვლევის **დანართი 13**) და „საჯარო დაწესებულებაში სტაჟირების გავლის წესისა და პირობების შესახებ“ სახელმწიფო პროგრამის დამტკიცების თაობაზე“ საქართველოს მთავრობის 2014 წლის 18 ივნისის N410 დადგენილების (წინამდებარე გზამკვლევის **დანართი 14**) შესაბამისად განხორციელებული პროცედურების დაცვით.

მოთხოვნას სტაჟირორთა რაოდენობის თაობაზე ბსუ-ს ადმინისტრაციას წარუდგენენ ბსუ-ს სტრუქტურული ერთეულების ხელმძღვანელები, საჭიროების მიხედვით. სტაჟირორთა შერჩევა ხდება კონკურსის წესით. კონკურსი ტარდება გასაუბრების ან/და ტესტირების ფორმით. კონკურსის ფორმას ყოველ კონკრეტულ შემთხვევაში კომისიის წარდგინებით ადგენს დამსაქმებელი, რაც აღინიშნება კონკურსის ჩატარების შესახებ განცხადებაში.

დამსაქმებელი უფლებამოსილია მიიღოს გადაწყვეტილება პირის კონკურსის გარეშე სტაჟირორად დანიშვნის თაობაზე.

სტაჟირორად მიიღება საქართველოს მოქალაქე, რომელსაც აქვს შესაბამის სტრუქტურულ ერთეულში დასაქმებისათვის საჭირო განათლება, დადგენილი საკვალიფიკაციო მოთხოვნების შესაბამისი უმაღლესი განათლება (არის ბსუ-ს საბაკალავრო პროგრამის მე-3 ან მე-4 სასწავლო წლის სტუდენტი ან კურსდამთავრებული ან ბსუ-ს სამაგისტრო საგანმანათლებლო პროგრამის სტუდენტი).

სტაჟირორი ვალდებულია:

- ა) სტაჟიორად დანიშნვიდან არაუგვიანეს ორი კვირისა საფუძვლიანად გაეცნოს დაწესებულების საქმიანობის მარეგულირებელ კანონმდებლობას;
- ბ) უფლებამოსილების განხორციელებისას განუხრელად იხელმძღვანელოს დაწესებულების საქმიანობის მარეგულირებელი კანონმდებლობით;
- გ) დადგენილ ვადებში შეასრულოს ყველა კანონიერი დავალება, რომელიც მას დაეკისრება ხელმძღვანელის მიერ;
- დ) იქონიოს კონტაქტი იმ დაწესებულების პერსონალთან, სადაც გადის სტაჟირებას;
- ე) შეასრულოს კანონმდებლობით გათვალისწინებული სხვა ვალდებულებები.

სტაჟირების ვადაზე ადრე შეწყვეტის საფუძვლებია:

- ა) პირადი განცხადება.
- ბ) ამ წესის დადგენილი სხვა შესაბამისი ნორმების დარღვევა;
- გ) არასაპატიო მიზეზით 5 დღის განმავლობაში სტაჟიორის შესაბამის ქვედანაყოფში გამოუცხადებლობა;
- დ) სტაჟიორის ვაკანტურ თანამდებობაზე დანიშვნა.

ბსუ-ში შესაძლებელია სტაჟირების გავლა „სტაჟირების სახელმწიფო პროგრამის“ ფარგლებში.

აღნიშნული სახელმწიფო პროგრამით გათვალისწინებული სტაჟირების გავლის წესი და

პირობები განსაზღვრულია „საჯარო დაწესებულებაში სტაჟირების გავლის წესისა და პირობების შესახებ“ სახელმწიფო პროგრამის დამტკიცების თაობაზე საქართველოს მთავრობის 2014 წლის 18 ივნისის N410 დადგენილებით.

სტაჟირების სახელმწიფო პროგრამა მიზნად ისახავს სტუდენტთა და კურსდამთავრებულთათვის ისეთი პროფესიული გამოცდილების მიღების შესაძლებლობას და პრაქტიკული უნარ-ჩვევების შეძენას, რაც აუცილებელია საჯარო მოხელისათვის.

პროექტის მიზნებიდან გამომდინარე, სტაჟირება ატარებს ერთჯერად ხასიათის, რათა მეტმა სტუდენტმა/კურსდამთავრებულმა მიიღოს საკუთარი საგანმანათლებლო პროფილის შესაბამისი პრაქტიკული გამოცდილება.

ბსუ-ს ილია ჭავჭავაძის ბიბლიოთეკით სარგებლობა

ბსუ-ს ადმინისტრაციის ხელმძღვანელის ბრძანებით დამტკიცებული „ბსუ-ს ბიბლიოთეკით სარგებლობის წესი“ (წინამდებარე გზამკვლევის დანართი 11). განსაზღვრავს ბსუ-ს ილია ჭავჭავაძის ბიბლიოთეკის მომსახურებით სარგებლობის რეგულაციას.

ბიბლიოთეკა ემსახურება ბსუ-ს სტუდენტებს, პერსონალს, ბსუ-ს სტუმრებს სხვადასხვა დაწესებულებებიდან, ასევე საქართველოს ნებისმიერ მოქალაქეს, საბიბლიოთეკო რესურსებით სარგებლობის სხვადასხვა უფლებით.

ბსუ-ს საბიბლიოთეკო რესურსებს შეადგენს საჭირო ინვენტარით აღჭურვილი სამკითხველო და კომპიუტერული დარბაზები, წიგნადი ფონდი, საბიბლიოთეკო კოლექციები, ელექტრონული ბიბლიოთეკა (ელექტრონული წიგნები და პერიოდული გამოცემები, აუდიო და ვიდეოჩანაწერები; ელექტრონული სამეცნიერო ბაზები), ბსუ-ს სამკითხველო დარბაზში სათანადო წიგნადი ფონდით სარგებლობის უფლება აქვს საქართველოს ნებისმიერ მოქალაქეს, ბსუ-ს სტუდენტს, პროფესიულ სტუდენტს, მსმენელებს, ასევე სტუმარს.

ბსუ-ს ბიბლიოთეკაში აბონემენტით მომსახურებით დაინტერესებულმა პირებმა ბიბლიოთეკის

შესაბამის განყოფილებაში უნდა გაიარონ რეგისტრაცია, რისთვისაც უნდა წარადგინონ „ბსუ-ს ბიბლიოთეკით სარგებლობის წესით“ განსაზღვრული დოკუმენტები.

რეგისტრირებულ მომხმარებელს ენიჭება საიდენტიფიკაციო კოდი და იქმნება ბსუ-ს ბიბლიოთეკის მომხმარებლის ბარათი. მომხმარებელი ვალდებულია გაეცნოს ბიბლიოთეკით სარგებლობის წესს, რასაც ადასტურებს მომხმარებლის ბარათზე ხელმოწერით.

ბსუ-ს სტუდენტური თვითმმართველობა

ბსუ-ს სტუდენტური თვითმმართველობის საქმიანობა რეგულირდება დებულებით (წინამდებარე გზამკვლევის **დანართი 15**) და ბსუ-ს სტუდენტური თვითმმართველობის საარჩევნო დებულებით (წინამდებარე გზამკვლევის **დანართი 16**). თვითმმართველობას ბსუ-ს ვებგვერდზე აქვს შესაბამისი ველი.

უნივერსიტეტის სტუდენტური თვითმმართველობა წარმოადგენს უნივერსიტეტის სტუდენტთა უმაღლეს წარმომადგენლობით ორგანოს - ფაკულტეტებიდან არჩეული სტუდენტური თვითმმართველობის ერთიანობას, რომელიც საქმიანობას წარმართავს „უმაღლესი განათლების შესახებ“ საქართველოს კანონის, ბსუ-ს წესდებისა და შესაბამისი დებულების მიხედვით.

ფაკულტეტის საბჭო შედგება ფაკულტეტის აკადემიური პერსონალის ყველა წევრისაგან და ფაკულტეტის სტუდენტთა თვითმმართველობის წარმომადგენლებისაგან, რომელთა რაოდენობა არ შეიძლება იყოს საბჭოს შემადგენლობის $\frac{1}{4}$ -ზე ნაკლები.

სტუდენტური თვითმმართველობის წევრთა უფლებამოსილების ვადა განისაზღვრება **2** (ორი) წლით.

ბსუ-ს ფაკულტეტებზე ასარჩევი ფაკულტეტის სტუდენტთა თვითმმართველობის წევრების რაოდენობა არ უნდა იყოს ფაკულტეტის აკადემიური პერსონალის $\frac{1}{3}$ -ზე ნაკლები. ზუსტ

რაოდენობას, არჩევნებამდე არანაკლებ ერთი თვით ადრე განსაზღვრავს თვითმმართველობის პრეზიდენტი.

ფაკულტეტის სტუდენტთა თვითმმართველობის და ფაკულტეტის საბჭოს წევრი ხდება არჩევნებში მონაწილე საუკეთესო შედეგის მქონე კანდიდატი.

არჩევნებში მონაწილე კანდიდატები თუკი მოიპოვებენ თანაბარი რაოდენობის ხმებს, ყველა მათგანი გახდება ფაკულტეტის სტუდენტთა თვითმმართველობის წევრი.

სტუდენტს ავტომატურად უწყდება თვითმმართველობის წევრის სტატუსი:

ა) ბსუ-ს სტუდენტის სტატუსის შეწყვეტის შემდეგ (საგანმანათლებლო პროგრამის ვადის ამოწურვა, პირადი განცხადება და სხვა);

ბ) 6 თვეზე მეტი ვადით შესაბამისი საფეხურის საგანმანათლებლო პროგრამის სტუდენტის სტატუსის შეჩერებისას ან გაცვლითი პროგრამის ფარგლებში უცხო ქვეყანაში სასწავლებლად წასვლა;

გ) ბსუ-ს ერთი ფაკულტეტიდან სხვა ფაკულტეტზე გადასვლის (მობილობის) შემთხვევაში.

თვითმმართველობის არჩევნები ცხადდება თვითმმართველობის პრეზიდენტის განკარგულებით, თვითმმართველობის უფლებამოსილების ვადის ამოწურვამდე არაუგვიანეს 1 (ერთი) თვისა, ასევე შესაბამისი ფაკულტეტის ადმინისტრაციის მოთხოვნის საფუძველზე ამ ფაკულტეტის სტუდენტური თვითმმართველობის წევრთა კანონით დადგენილი რაოდენობის შევსების საჭიროების შემთხვევაში, ასეთი მოთხოვნიდან არაუგვიანეს 1 (ერთი) თვისა.

ფაკულტეტის თვითმმართველობის წარმომადგენლობითი ორგანოს არჩევნებში მონაწილეობის უფლება აქვს ბსუ-ს ნებისმიერ სტუდენტს (ამომრჩეველი) ბსუ-ს ბაკალავრიატის, მაგისტრატურისა და დოქტორანტურის საფეხურიდან, გარდა სტატუსშეჩერებული პირებისა. არჩევნებში კანდიდატად შეიძლება დარეგისტრირდეს აქტიური სტატუსის მქონე ბსუ-ს ბაკალავრიატის პირველი, მე-2, მე-3, მე-4, მე-5, მე-6 და მე-7 სემესტრის სტუდენტი ან მაგისტრატურის პირველი, მე-2 სემესტრის ან მე-3 სემესტრის სტუდენტი.

პირველადი სამედიცინო დახმარება

„ბსუ-ს ტერიტორიაზე პირველადი სამედიცინო დახმარების მიღების ინსტრუქციის დამტკიცების შესახებ“ ბსუ-ს ადმინისტრაციის ხელმძღვანელის 2016 წლის 02 დეკემბრის N01-11/79 ბრძანების (წინამდებარე გზამკვლევის **დანართი 12**) თანახმად, ბსუ-ში პირველადი სამედიცინო დახმარების მიღების უზრუნველსაყოფად მოქმედებს სამედიცინო დახმარების კაბინეტი, რომელიც განთავსებულია ბსუ-ს იურიდიულ მისამართზე (ქ. ბათუმი, ნინოშვილის/რუსთაველის N35/32), მე-2 კორპუსის (რუსთაველზე მდებარე) პირველ სართულზე, ოთახი N100. კაბინეტს აქვს ბუნებრივი და ხელოვნური განათება, ნიავედება ბუნებრივი წესით და მუდმივად მარაგდება ცივი და ცხელი წყლით. კაბინეტი აღჭურვილია პირველადი სამედიცინო დახმარების აღმოჩენისათვის საჭირო ინვენტარით (შესაბამისი მედიკამენტებით აღჭურვილი „გადაუდებელი დახმარების ჩანთა“, წნევის აპარატი, თერმომეტრი, გლუკომეტრი - შაქრის საზომი, დეფიბრილატორი).

უნივერსიტეტის ტერიტორიაზე ინსტრუქციით გათვალისწინებული შემთხვევის (მათ შორის უბედური შემთხვევის) დადგომისთანავე ნებისმიერმა პირმა უნდა შეასრულოს შემდეგი მოქმედებები:

- ა) დროულად მიმართოს პირველადი სამედიცინო დახმარების გაწევაზე პასუხისმგებელ პირს ამ მუხლის პირველ პუნქტში მითითებულ ადგილზე ან/და დარეკოს (კომუნიკაციის საშუალებების შესახებ მითითება საინფორმაციო დაფებზე და განთავსდება ბსუ-ს ვებგვერდზე);
- ბ) შეატყობინოს ბსუ-ს დაცვისა და უსაფრთხოების სამსახურს (კომუნიკაციის საშუალებების შესახებ მითითება საინფორმაციო დაფებზე და განთავსდება ბსუ-ს ვებგვერდზე);
- გ) არ გადაადგილოს დაზარალებული ექიმის მოსვლამდე, გარდა იმ შემთხვევისა, როცა იქ დარჩენა სახიფათოა;
- დ) აუცილებლობის შემთხვევაში გამოიძახოს სასწრაფო სამედიცინო ან/და სახანძრო სამსახური (დაუკავშირდეს ნომერზე - 112) ან/და სხვა შესაბამისი სამსახური.

პირველადი სამედიცინო დახმარების აღმოჩენისათვის პასუხისმგებელია სამედიცინო კაბინეტის ხელმძღვანელი/პირველადი სამედიცინო დახმარების სპეციალისტი - უნივერსიტეტის იურიდიულ მისამართზე (N1,2,3 კორპუსები), ხოლო ბსუ-ს სხვა შესაბამის კორპუსის ტერიტორიაზე - შესაბამისი დასაქმებული.

უნივერსიტეტის მატერიალურ-ტექნიკური საშუალებებით და ინფრასტრუქტურით სარგებლობა

ბსუ-ს სტუდენტების, პროფესიული სტუდენტების, მსმენელების და პერსონალისათვის ბსუ-ს ადმინისტრაცია უზრუნველყოფს ბსუ-ს საკუთრებაში/სარგებლობაში არსებული შემდეგი ინფრასტრუქტურის ხელმისაწვდომობას:

- ა) N1, N2 და N3 კორპუსებში (მდებარე ქ. ბათუმში, რუსთაველის/ნინოშვილის ქ. N 32/35) - ბსუ-ს ილია ჭავჭავაძის ბიბლიოთეკა, აუდიტორიები, ლაბორატორიები, IT ინფრასტრუქტურა, კომპიუტერული კლასები, სპორტული დარბაზები, სააქტო დარბაზი, სტომატოლოგიური კლინიკა „ბსუ დენტი“, საერთო სარგებლობის სივრცეები;
- ბ) ბსუ-ს N4 კორპუსში (მდებარე ქ. ბათუმში, ფიროსმანის ქ. N12) - ფაბლაზი და საგამოცდო ცენტრი;
- გ) ბსუ-ს N7 კორპუსში (ქ. ბათუმში, ლეონიძის ქ. N15) - უნივერსიტეტის საერთო საცხოვრებელი;
- დ) პრაქტიკის ობიექტები - შესაბამისი საგანმანათლებლო პროგრამით გათვალისწინებული პრაქტიკის განხორციელებისათვის ბსუ-ს და პრაქტიკის ობიექტებთან გაფორმებული მემორანდუმების ფარგლებში და ბსუ-ს სამართლებრივი აქტებით გათვალისწინებული წესით და განრიგით;
- ე) სხვა საინფორმაციო/ელექტრონული რესურსების ხელმისაწვდომობას, რაც გათვალისწინებული იქნება შესაბამისი სამართლებრივი აქტით/ხელშეკრულებით/მემორანდუმით.

სასწავლო პროცესის განხორციელებისათვის საჭირო ინფრასტრუქტურის ხელმისაწვდომობის, მასალებით და ნედლეულით შეუფერხებელი უზრუნველყოფის მიზნით, ბსუ-ს უფლებამოსილი დასაქმებული (კომპეტენციის ფარგლებში), უნივერსიტეტის მატერიალური რესურსების მართვის დეპარტამენტთან კოორდინირებული მუშაობით და

სტრუქტურული ერთეულის უფროსთან შეთანხმებით (ვიზირებით) წარუდგენს სამსახურებრივი ბარათს ადმინისტრაციის ხელმძღვანელს.

ბსუ-ს ინფორმაციული ტექნოლოგიების ინფრასტრუქტურა ხელმისაწვდომია ბსუ-ს პერსონალის, პროფესიული სტუდენტებისა და სტუდენტებისათვის:

1. კომპიუტერული ტექნიკა, რომლებიც ჩართულია ინტერნეტში:

- ა) ე.წ. „კომპიუტერულ კლასებში“ - სააუდიტორიო მეცადინეობების პერიოდში (საათებში);
- ბ) საერთო სარგებლობის სივრცეებში, დერეფნებში და ბიბლიოთეკაში განთავსებულ კომპიუტერებზე - ნებისმიერ დროს;
- გ) სამუშაო ოთახებში განთავსებულ ტექნიკაზე - შესაბამის პერსონალს;

2. უკაბელო ინტერნეტი - ნებისმიერ დროს (არის თავისუფალი, პაროლის გარეშე);

3. პროექტორები - სააუდიტორიო მეცადინეობების პერიოდში (საათებში), ასევე ნებისმიერ დროს, საჭიროების შემთხვევაში;

4. ქსეროქსის აპარატები - ბსუ-ს სამუშაო საათებში.

უნივერსიტეტის საერთო საცხოვრებელი

საერთო საცხოვრებელით სარგებლობის პროცესის ადმინისტრირება/მენეჯმენტი ხორციელდება ბსუ-ს ადმინისტრაციის ხელმძღვანელის ბრძანებით დამტკიცებული რეგულაციების შესაბამისად (საერთო საცხოვრებელით სარგებლობის წესი - წინამდებარე გზამკვლევის **დანართი N22**; სარგებლობის საფასურის განსაზღვრის ბრძანება - წინამდებარე გზამკვლევის **დანართი N25**; სტუდენტების/პროფესიული სტუდენტებისა და სხვა პირებისათვის ადგილების რაოდენობის განსაზღვრის შესახებ ბრძანება - წინამდებარე გზამკვლევის **დანართი N26**).

საერთო საცხოვრებელით შეიძლება შესაბამისი საფასურის გადახდის სანაცვლოდ ისარგებლოს (სასყიდლიანი სარგებლობა) :

ა) ბსუ-ს სტუდენტმა;

ბ) პროფესიულმა სტუდენტმა.